

COMUNICÂT STAMPE

ANCJE UN CONCORS A PREMIS PAR SIELZI L'ARTIST PREFERÎT

ARLEF E PRESENTE LA GRANDE MUSICHE A FRIULI DOC: IN ANTEPRIME "GORAI" DI LINO STRAULINO

Vinars ai 13 SUNS, Antologjie de Gnove musiche furlane

Udin, ai 4 di Setembar 2013 - E sarà la grande musiche furlane la protagoniste in place dai Grans a Udin tai dîs di Friuli Doc. La ARLeF, Agenzie regionâl pe lenghe furlane, e à inmaneât di fat une schirie di apontaments che si inviaran joibe ai 12 di Setembar, aes 21, cul concerti di Lino Straulino.

"ARLeF e sarà presinte pe prime volte a Friuli Doc. Nus soomee une buine ocasion - al spieghe il president, Lorenzo Zanon - par lâ in place, jenfri la int, a fâ cognossi lis ativitâts che la Agenzie e davuelç pe promozion de lenghe furlane. In plui dal spazi ARLeF che al restarà viert dilunc dute la manifestazion e che al metarà a disposizion materiâl informatîf, gadget e gnovis publicazions, tant che par esempi il dvd de Pimpa par furlan pai fruts, o vin sielzût tant che teme dai nestrîs events la musiche, suaze indulà che la lenghe furlane e mostre di timp vivarositât fûr dal vade".

Si scomence juste apont joibe cu la scree di "Gorai" il gnûf cd dal cjantautôr cjargnel, che al varà dongje tant che ospits il grup dai Jonokognos e l'udinês Stefano Fedele.

"Chest gnûf lavôr - al spieghe Straulino - al met dongje, propit tant che une golaine di corai che o ai sielzût pal titul, lis plui bielîs cjançons ineditis che o ai scrit tai ultins dîs agns. Al è un disc che al siere un cicli, indulà che o ai cirût di contâ il mont che o vin ator, i mudaments de societât".

Dal pont di viste musicâl i riferiments a son ancjemò chei peâts ae grande tradizion folk europeane, ma soledut americane. "Lu ai registrât dut in Friûl - al zonte il cjantautôr - cuntun lavôr o disarès artesanâl, cence mai doprâ il digjitâl e cuntune cure particolâr pai timbris che o crôt e sarà une vore preseade". Chest caratar "vintage" si mostre fintremai te siele di produci une version ancje in vinîl.

Il concerti di Straulino, un dai massims esponents de Gnove musiche furlane, la corint musicâl caraterizade dal ûs de lenghe furlane tant che veicul di espression intun contest gnûf, indulà che la lenghe e ven sperimentade su gjenars musicâi diferents e forescj, al introdusarà ancje l'apontament dal dì dopo, vinars ai 13 di Setembar, simpri in place dai Grans, cuant che des 17.30 e vignarà presentade "Suns, antologjie de gnove musiche furlane".

Ae presentazion, che e sarà moderade dal diretôr de ARLeF, William Cisilino, a saran presints, in plui di Valter Colle, i curadôrs dai tescj dai trê volums Luigi Gregoris, Marco Stolfo, Nicola Cossar e Andrea Ioime.

Al è un projet inviât tal 2008 che al à quartât ae publicazion di trê cd intune custodie e indulà che e ven contade propit la storie di chel fenomen cu lis plui bielis e impuartantis musicchis e lirichis par furlan. Deventade moviment tai agns Novante, ma inviadè za dai agns Setante, la Gnove musiche furlane si è svilupade e si è fate notâ ancje fûr dal Friûl, in Europe. De cjançon di autôr fintremai al jazz, dal folk al rap, il furlan al è stât declinât di tancj musiciscj e grups cuntune discografie largje che pe prime volte e je stade organizade e presentade in maniere sistemiche in cheste antologjie produsude di Valter Colle cu la poie e la colaborazion de ARLeF.

I amants de musiche a podaran vinci la antologjie cjapant part al concurs de ARLeF propit in ocasion di Friuli Doc e che al fâs vinci 500 copiis de opare: par partecipâ al baste compilâ la schede metude a disposizion tal spazi de Agenzie in place dai Grans e votâ l'artist furlan preferît.